

Վերը նշված բովանդակային զույգ սևեռումների ուղղահայաց զարգացումներում Դավրիժեցու պատմագիրքը երևանում է բովանդակային չափազանց լայն ընդգրկումներ՝ ներառելով կրոնական, եկեղեցական կյանքն ու քաղաքական, տնտեսական կացությունը, անդրադարձներ են կատարվում մշակութային, գիտական կյանքին, տարբեր գործիչների գործունեությանը, արձարծվում են կրոնական, փիլիսոփայական խնդիրներ և այլն: Այդ առումով Դավրիժեցու «Գիրք պատմութեանց» աշխատությունն առանձնանում է նախորդ պատմագիրների երկերից: «Նա հայոց պատմության շարադրանքը վերցնում է լայն առումով,– գրում է Վարազ Առաքելյանը:– Գուցե առաջին պատմիչն է մեզանում, որ իր գրքում մայր հայրենիքի պատմության հետ հյուսում է հայ գաղութների մեջ կատարվող անցուդարձերը»¹⁶: Խոսքը հատկապես վերաբերում է լեհահայ համայնքի կյանքին, որ վկայագրված է «Պատմութիւն նեղութեանց ու վշտոց, որ կրեցին Հայ ազգաւ քրիստոնեայքն, որք բնակեալ են ի քաղաքն Իլով» վերնագրով ԻԸ գլխում, ինչպես նաև՝ Շահ-Աբասի կողմից Պարսկաստան տարված հայ գաղթականների հետագա ճակատագրին արդեն նոր ապրելավայրերում: Բացի այս, նույն գիտնականի հավաստմամբ՝ «Հայոց հարուստ պատմագրության մեջ չկա մի գիրք, որ այնքան մանրամասնորեն ներկայացնի հայոց դպրոցների պատմությունը, ինչպես Դավրիժեցին», և որ՝ «Մեր պատմիչներից ոչ մեկը այնպիսի մանրամասնությամբ չի խոսում երկրի շինարարական գործի մասին, ինչպես Դավրիժեցին»¹⁷:

Բովանդակային այդպիսի լայն ընդգրկումը ոչ միայն Դավրիժեցու պատմագրքին է հատկական, այլ նաև, ընդհանուր առմամբ, ուշ միջնադարի պատմագրության առանձնահատկություններից է: **«Ուշ միջնադարի հայ պատմագիրների, ժամանակագիրների,**

¹⁶ Վարազ Առաքելյան, Առաքել Դավրիժեցի (մահվան 300-ամյակի առթիվ), «Պատմաբանասիրական հանդես», 1970, թիվ 3, էջ 43:

¹⁷ Նույն տեղում, էջ 37: